

«Frustraziun, tema e malsegirezza»

Madleina Candrian passenta in segiurn en Spagna, nua ch'i regia la pli auta dischoccupaziun en Europa, surtut tar absolventas ed absolvents dad in studi. Ella ha perquai intervistà ina giuvna dal Pajais Basc che declera sia situaziun e quella da sia generaziun.

Madleina Candrian/GiuRu

Durant mes segiurn a l'ester hai jau constatà che la situaziun sin il martgà da lavur en Svizra è per glied giuvna bler meglra ch'en Spagna. En discurs m'han collegas dal Pajais Basc en Spagna raquintà che la gronda part dals giuvens studegian, na chattan dentant suenter in studi betg immediatamain ina lavur. I vegni pretendi ch'ins haja gia experientscha pratica. Dad acquirir talas plazzas da practicum saja dentant era puspè difficil, cunquai che da chattar in practicum ni in job accessoric saja senza studi terminà quasi nunpussaivel. Questa situaziun desperada m'ha consternà durant mes segiurn. Per udir dapli davart la situaziun hai jau fatg in'intervista cun *Naia*, ina dunna giuvna da 18 onns, che viva en il Pajais Basc e che ha entschet questa stad il studi d'inschigneria.

GiuRu: Naia, ti studegias inschigneria. Pertge es ti ta decidida per quest studi?

Naia: A mai plascha da chapir co che las chaussas ed ils process en l'industria funcziunan. Jau crai ch'il studi d'inschigneria ta possia dar bleras infurmaziuns davart tut quests process. Plinavant m'interessa era il fastiz ecologic da fatschentas e fabricas e jau ma spezialiss gugent en quest champ per esser abla da minimar il fastiz ecologic ed uschia contribuir insatg al meglierament en connex cun la polluziun da l'ambient.

Pudessas ti descriver curtamain la situaziun da chattar lavur en il Pajais Basc e Spagna?

Il Pajais Basc è la communitad autonoma cun la quota da dischoccupaziun la pli pitschna en Spagna, para enturn 8,4 %. Dentant, era sche quai è pauc en cumparegliaziun cun il rest da la Spagna, èsi ina quota fitg auta da glied che na chatta betg ina piazza da lavur. Dad ina vart èn ils giuvens – per els èsi grev da chattar lavur perquai ch'els/ellas n'han naginas experientschas praticas e las firmas ni fatschentas na pajan betg bain per glied senza experientschas. Da l'auter maun è la glied ch'è pli veglia che 50 onns che ha era problems da chattar plazzas da lavur. En fatschentas pli grondas dettia para roboters che legian la data da naschientscha sin mintg'annunzia per ina piazza. Quel roboter zavria glied «pli veglia» senza ch'il employader ha insumma legi l'annunzia. Pia ha la glied pli veglia paucas schanzas sin ina piazza.

Tge effectuescha questa situaziun difficila da chattar ina piazza tar la glied giuvna e tge sentiments provochescha questa situaziun?

Frustraziun, tema e malsegirezza. Quai èn crai il plets che defineschan il meglier quai che blers giuvens sentan areguard la situaziun sin il martgà da lavur. Schizunt giuvens ch'han fatg in studi da master en in rom, han difficultads da chattar lavur. Jau hai legi che bunamain 600 000 personas sut 25 onns tschertgan actualmain ina piazza da lavur en Spagna. Quai

influenzescha natiralmain era ils plans da futur da la glieud giuvna – ins ha tema da betg avoir avunda daners per pudair furmar ina famiglia ed anc blers auters dubis e temas.

Tge giavischs pertutgant ina piazza da lavur has ti per tes futur?

Cun mes studi d'inschignera sper jau da betg avoir tants problems da chattar ina piazza da lavur. La dumonda per inschigners/inschigneras è gronda, cunzunt qua en il Pajais Basc. Jau sper ch'jau haja la schanza da pudair lavurar insatge che ma plascha e che ha da far cun ecologia e cun la restauraziun ambientala.